

L E

PROTECTEUR DES
PRINCES,

A LA REYNE.

IL faut que comme bon François, j'ayme les bons François, & que comme seruiteur des seruiteurs de mon Roy, j'espouse leur eaule, & qu'auec eux ie face party avec le bien public, & grandeur de mon Roy: j'honore trop le zeile de nos Princes, de ces braues Princes, que mon cœur touché d'amour, & mon ame d'admiration adore en les voyant, & ne pense les voir allez pour les adorer, pour luy desuier vn effort de ma plume. Et bien que le courage des braues n'ayt besoing des ces honneurs, qui se tirent sur le papier, & que par l'aduis des Assyriens on ne doibue dresser d'idoles au Soleil, parce qu'il se montre mieux de luy mesme que la main du maistre ne le scauroit tirer toutesfois comme c'est le propre de l'air embaumé de quelque bonne odeur de flairer souefuement: il faut aussi qu'un cœur fleurdelisé, & battu sur le coing de la fidelité Françoisie porte au besoing l'attestation de son affection, ou sur le trenchant de son espee, ou sur la poincte de sa plume, pour l'exposer aux ieux de tout le monde. Ainsi il faut que ma plume seconde mon cœur, & que comme du cœur j'honore & embrasse la grandeur de mon Roy, que ma plume en mon zeile face voir l'affection de mon cœur, & l'amour de ma patrie en la franchise de mes discours. Et que puis que ie reueré le courage & l'affection de nos bons Princes au bien de la patrie, que mon Anchre à la ruine de l'anchre de Florence serue de tesmoinage au public des iustes intentions que ces braues ont voué au bien de ceste Monarchie.

Et d'autant, Madame, que nos bons Bazanez crient que ces Princes, ces zelez protecteurs de cest Estat sont des bouteux de nostre repos, & que vous, Madame, vous estes comportee en leur endroict en bonne mere, ie veux faire voir au public par vn veritable recit de leurs actions, qu'ils se sont tous portez en vostre endroict en bons enfans, & vous au contraire en Iunon, marastre. Et que leur sainct zeile ayant esté recogneu,

iustice, que vous vous estes esleuee, & contre ces bons Princes, & contre ces bons François, & contre la iustice, afin que le public iuge, si quand la raison est mesprisée, la force n'est pas necessaire: Et si quand on se iouie d'une Monarchie, & qu'on la veut gouverner plustost par passion que par raison, ceux qui ont part à l'estat ne doiuent pas s'efforcer de conseruer par amour ou par force la grandeur de l'Estat.

Ainsi, Madame, pour commencer par les louables & zelees actions de nostre braue Prince, de nostre premier Prince du sang: Et par les traictemens qu'il a receu de vostre Majesté, Je diray, Madame, que ce grand Prince ennemy du desordre & de la confusion s'est tousiours monstré aux François en bon Genie, comme l'ampridius Probus aux Romains, & tout en feu d'amour, comme Pallas parroissoit en feu à Diomedes pour le preseruer des dangers de la mort, a respiré tousiours la gloire de son ieune Roy, & fait voir à tous, que son interest particulier, n'a peu aller si auant, que le zelle qu'il a iuré au bien public, & à la fermeté du repos, de la grandeur, & autorité publique.

Nous sçauons, Madame, & vous mieux que nous, que ce bon Prince, depuis le premier iour qu'il a eu l'honneur de vous toucher d'alliance, & de proximité, a vescu en vostre endroict en fils, mais en bon fils. Et qui ne sçait, comme à la mort de nostre Grand Henry, de nostre bon pere, il prit le noir, sur les iours noirs de France reuint de son exil, non à main armee, comme vn autre eust peu faire, mais la larme à l'œil, les sanglots à la bouche, & la douleur au cœur, recogneut nostre Dauphin pour son Oingt, pour son Roy, fit party avec interest de son bien, de sa gloire, & de sa grandeur. Et en vostre endroict que ne fit-il pas? & que n'a-il pas fait pour vous obliger à luy vouloir du bien.

Il a, ouy ce braue Prince pour vous autoriser en la regence de ce puissant Royaume ofensa sa qualité, & trahy son merite, a esté tousiours sur le zele, sur l'honneur, sur le respect, & sur l'affection: & vous tout au contraire, auez payé ses bonnes volontez de haine, & de mespris: l'auiez déplacé & priué de la connoissance des affaires d'Estat pour plaire à l'humeur des personnes artificieuses, & ennemies de la gloire de ce bon Prince, pour en laisser le maniement à des morfondus, à des ethiques, & à des Facquins, qui affriandez de ceste douce viande pour le perpetuer en l'excez de ce pouuoir ont vendu le Roy, l'Estar & la patrie: en sorte que l'ennemy de nostre repos, de nostre gloire, & de nostre grandeur est à la veille de moissonner le fruit.

de ses ambitions, si nos bons Princes, & si les vrayz François par leur vailleu de leur espee ne recueillēt, & accueillent la violence de cest ennemy, qui sous vn sacré pretexte d'alliance accourt au trot: & au gallop aux ruines de cet Estat: & si par leur sage & genereuse conduicte ils ne mettent cest Empire, ce florissant Empire à couuert de ceste oppression, & ne le releuent par effort d'un masse & genereux courage de ceste prochaine ruine. Helas qui ne le voit? qui n'en crie & qui n'en pleure;

Mais encore, Madame, vous sçavez quel cœur ils ont ces meschans dæmons contre ce Prince, quels, & combien funestes leur artifices, vous avez veu, comme ces pernietieux à ceste leuee d'armes que la pitié, & la compassion des ruines de cest Estat auoit fait prendre à ce Prince, effrayez de la crainte du supplice que meritoient leur crimes: & voyans qu'il estoit trop fort pour emporter de haute lute, firent les cameleons, vous persuaderent de le gagner par des belles paroles, de l'endormir aux appas de l'esperance d'un bon amendement de nos mœurs, comme la lune ne pouuant iouyr d'endimion l'endormit pour plusieurs mois, comme Iunon pour traualier l'Hercule des Poetes faisoit malicieusement endormir Iuppiter, & avez si bié fauorisé leur pernietieux desseins, que ce bon Prince, qui porte escrit sur le front, ce qui est dans son cœur, qui n'a d'ambition, que du bien & grandeur de l'Estat, comme d'un patrimoine, auquel il a notable part, & qui a tousiours postposé l'intérest de ses iustes plaintes au repos des subiets de son Roy, croyant que vostre ame & celle de nos bons Agans, fussent de bonne mise, comme la sienne, que les effects seconderoient vos paroles, comme ses paroles n'ont iamais dementi l'effect de ses promesses, posa les armes, ferma la porte à la rebellion, au desordre, au sang, & au carnage, & nous ramena du triste liét de nos apprehensions à nostre premiere santé.

Mais, Madame comme vostre cœur estoit esloigné de la verité de ces belles paroles, il a eu ce bon Prince, vostre langue, mais non pas vostre cœur. Ha! Madame, il faut porter sur le front ce qui est en l'esprit, comme dit Plotin. Et comme le visage n'est qu'une ame racourcie, & comme son escusson a plusieurs quartiers, aussi il ne doit trahir, ny falsifier la bonté de nature, qui de son vray coing a imprimé nos naturels sur nos frôts mesmes. Et puis que nostre intelligence se conduit par la seule voye de la parole, ne peut on pas dire que celuy qui la fausse trahit la société publique? Si c'est le seul outil, par le moyen duquel nos volonteiz se communiquent, & nos pensees, & le

truchement de nostre ame, n'est il pas vray, que quand il nous trompe nous ne nous tenons plus? & que quand il nous deçoit, il deçoit tout nostre commerce, & dissout de toutes les liaisons de nostre police?

Voulez-vous que ie le face voir, Madame, comme la parole a trompé, & nous, & ce grand Prince? voulez vous que ie le montre comme nostre Arresté de paix de Sainte Manehou n'estoit compolé de vostre costé que de pieces fausses, malicieuses, & artificieuses? Et pour commencer par le plus signalé monopole, qu'on a tramé pour alterer la gloire du dessein de ce prince, n'est il pas vray que le voyant cheri, & aimé de tous les bons François, pour les rendre odieux, & ruiner d'amitié, de credit, & d'autorité, on luy dressa calomnieusement ceste partie de Poitiers? on cria l'alarme, qu'il vouloit ce bon Prince partager cest Estat, ou plustost iouer au boutehors avec son ieune Roy: que chantoit autre chose ceste leuee de bouclier, & ce voyage que le Roy fit à poitiers? Poitiers, peuple mutin, peuple seditieux, tu le sçay, vousle scauez, venerable prelat, qui avez esté le funestre fuzil de ce brasier? mais plus à plein vous le sçavez, prudent Phillippeau, qui avez donné les memoires de ceste batteries, & encore pour autoriser ceste funestre tragedie & attirer l'indination des autres villes du Royaume, on a chassé, banni, exilé, & priué de leur charges tant de gens de bien, tant zelez, & fideles Officiere, comme factieux & traistres au Roy & à l'Estat. Mais encore de quel front a-on peu si calomnieusement mettre en auant ce malicieux dessein? n'est elle pas belle l'apparence? que ce prince luy quinziésme apres auoir possé les armes, ait voulu prendre vne ville riche en hommes, & des plus fortes du Royaume? Helas! que la posterité rira, quand elle lira ce subtil artifice, ceste belle menée, ceste leuee d'armes que l'on fit, pour aller attaquer ce Prince desarmé, & en estat de suppliant, mais qu'elle fut belle la iustice qu'on luy rendit ceste offence: Adieu l'honneur, adieu respect, adieu ieureté de nos princes, puis que les affronts qu'on leur fait ont l'honneur de la gloire, & des bonnes pensions.

Mais encore quel malicieux artifice fut celuy duquel on se seruit à Bordeaux, ville capitale du gouvernement de ce prince, pour le rendre odieux par toutes les villes de la Guienne? On fit accroire au peuple que ce prince estoit arrivé de nuit en leur ville, qu'il estoit caché enquelque maison: & que c'estoit pour monopoler contre leur liberté, & que par ainsi il falloit apporter proprement le remede à ce mal, Et tout aussi tost

qu'elles recherche exactes ne fit-on pas dans les maisons de ceux qui ont l'honneur d'estre seruiteurs de ce prince, & quels vacarmes ne fit-on au parlement, les Chambres assemblees? Et en fin apres ces recherches ne l'ayant peu trouuer, pour en estre esloigné de cent lieues ou plus, le parlement desirant signaler sa prudence, ou plustost sa folie, prononça vn arrest memorable, à sçauoir que où ce Prince se representeroit pour entrer dans la ville, que les portes luy seroient refusees. N'est ce pas vne belle suite l'action de poictiers? Et ce beau parlement ne tient il pas de la maladie de son sage prelat, comme le peuple de poictiers de celle de l'Euesque? Ha! qu'elle a esté puissante ceste annee passée la constellation de nos bons prelats, de nos bons pasteurs, puis que tant & tant de testes ont marché à la demarche & cadence de leur folie? Ha! Bordeaux, ha! peuple ingrat, est-ce ainsi que tu recognois l'honneur que tu dois à ton Gouverneur, à ton prince? Est-ce ainsi que tu veux fuyr l'aspect de ce grand Soleil, pour estre priné de l'honneur & de la gloire que tu reçois de sa presence, comme la lune perd la lumiere qu'elle auoit du Soleil, lors qu'elle suit son aspect, & se iette dans les tenebres. Est-ce ainsi que tu deschires l'honneur de ce grand prince, apres en auoir receu tant de biensfaits, comme les Lybiens bruslent la tige & le branchage du Ladanon, apres auoir cueilli la gomme aromatique? Et vous grand parlement, qu'avez-vous fait, quel sinistre iugement avez-vous donné sans charge contre l'innocence des actions de ce prince, qui vous carraisoit, qui vous honoroit, & vous cherissoit avec tant d'affection? Desbauchez, ouy, vous l'estiez par trop de l'esprit; i'en rougis, i'en ay honte, qu'une si grande compagnie ait fait vn si grand pas de Clerc? Voyez maintenant si les intentions de ce prince sont zelees, puis que ce grand Senat, & grand parlement de Paris espouse son party.

Et bien que ce bon Prince eust subiet de tirer raison de toutes ces offences, toutesfois de peur de nous reslancer en l'horreur de nos diuisions, aima mieux s'offencer soy-mesme, que d'alterer le calme qu'il nous auoit donné, & gagné par ceste charitable consideration, ne voulut autres armes que l'oubly, n'y d'ambition, que de rendre pres de son Roy.

Mais comme ces meschans Agans ne ce peuent accrediter qu'en son absence, aussi s'opposerent-ils long-temps à son retour, & pour tesmoignage de ce desplaisir, vous fistes, Madame, à leur persuation defense à la Noblesse d'aller au deuant, & de luy rendre l'honneur que sa qualité & ses bons seruitices

meritoient & demandoient du deuoir d'un chacun.

Mais arriué que ce Prince fut, quels tesmoignages de bonne volonté n'avez-vous receu de son obeissance? qu'avez-vous désiré qu'il n'ait voulu? & qu'avez-vous voulu qu'il n'ait exécuté? Vous avez désiré contre le traité de sainte Manehoud la tenue des Estats en la ville de Paris, & luy aussi. Mais perfidie par trop grande, c'estoit un artifice pour tirer avec aisance, party des passions ruineuse des ennemis de nostre repos: vous voulustes qu'il ne parlât à l'ouverture des Estats, comme il vouloit faire, pour faire voir le zele motif de ces iustes intentions. Mais parce que le iugement de son zele seruoit de condamnation, de honte & de confusion à nos Bazanez, ce bon Prince qui ne médie d'ailleurs que de soy-mesme des tesmoignages ny d'applaudissemens de ses actions, que de la complaisance & satis-faction de sa propre conscience, n'eust de langue que pour se taire. Et encores vous fistes defenses aux deputez que si ce Prince se presentoit aux Estats pour parler de rompre l'assemblée, de peur que les Deputez ne recognoissent l'ulcere de l'Estat; ainsi Minerve fauorisant le party des Grecs, pour leur donner l'aduantage retira Mars du combat qui fauorisoit les Troyens: Ainsi les loups, dit Esope, demanderent les chiens pour plus facilement deuorer les agneaux. Ha! pauvre Deputés, où est le courage, où l'honneur, où la liberté François? quoy, craignez-vous la langue de ce prince? Ses discours, il est vray, sont animez d'une force guerriere, mais plus guerriere qu'il n'estoient iadis les harangues de Demosthene, qu'il apelloit soldats, d'un fen plus diuin que celui qui sortoit de la bouche de Cacus ou de Sapho, d'une roideur, mais toute autre que n'auoient les discours de pericles qu'on apelloit des foudres. Ils estoient, il est vray, à craindre, ces eloquens discours, & ces paroles massés; ouy, ils eussent rompu la trame des malheureux projets de l'ennemy de cet Estat, & vous vous en fussiez retournés au lieu de la haine & indignation, que vous avez encouru du peuple, chargé d'amour, d'honneur & de gloire.

Mais, encore, Madame, que diray-je, mais que ne dit tout le monde de la passion que vous eustes pour les bastonnades que le Prince fit donner pour chastiment d'une trahison domestique? n'auons-nous pas veu l'esmotion qu'on a voulu faire? n'auons nous pas sceu comme on a brigué la maison de ville, le parlement & les Estats, donné au Roy ce detestable aduis de se servir de l'Eglise, du couteau de la iustice, tous les discours qui se sont tenus à la fourdine, & comme en attendant un de-

eret contre le fleur de Rochefort, en auoit resolu d'enuoyer deux compagnies du regiment des gardes pour boucher son Hostel: resolution qui eust esté suiue de l'effect, si quelque bon Genie ne s'y fust opposé. Las ! hélas ! Dieux tutelaires de ces sacrez Hostels, où est vostre respect ? Ha ! Madame, où sera la seureté, si elle n'est avec nos domestiques ? Les prestres des Dieux, disoit vn certain, sont les plus seures gardes de leurs temples saincts & sacrez, & les seruiteurs les plus fideles gardiens des secrets & de la vie de leurs Maistres. Zopyre n'aimoit rien tant que son Xerxes, Ephestion que son Alexandre. Et tout au contraire ce seruiteur perfide & desloyal, oubliant son deuoir & les biens faits de son maistre, l'a vendu, l'a trahy, & pour vn leger chastiment qu'on a voulu prendre de ceste perfidie, vous avez donné l'essor à vostre passion, avez receu ce desloyal en la protection du Roy, & avez poursuiuy le maistre comme criminel de leze Maiesté. Ha ! Madame, cet effort qui fut fait à main armee par vn cadet de Gascogne à l'authorité de ce grand parlement, & au mespris de l'obeissance de nostre ieune Roy ne fut pas si criminellement puny, la consideration de la cabale fut plus forte que l'interest de l'authorité du Roy, & seureté de l'Estat. Les assassins encore proiettez, resolus, & executez par vn coyon, & par vn estrangier contre des Seigneurs signalez ont trouué le ur couuert & leur impunité, & de bastonnades ont eu besoin d'abolition.

Et d'aillicurs, n'auons-nous pas veu comme ces l'asches intendans, ialoux du bon accueil que ce grand parlement fait à ce prince, & du zele qu'il a voué au bien de la iustice, ont crié l'alarme, vous ont volontairement fait accroire que vous estiez à la veille d'estre depossedee, & par ainsi qu'il luy faillloit defendre à la premiere occasion, l'entree au Parlement. Et ioignant les effects à ce mauuais dessein, sur l'aduis qu'ils eurent que les Chambres se doiuent assembler, vous en sçauiez, Madame, mieux que moy le subiect, vous enuoyastes sous le nom du Roy luy faire defenses d'aller au parlement : & encore pour adiouter à ceste offense vn signalé affront, vous fistes boncler son Hostel de gendarmes. Ha ! ie vois bien, ces meschans ne veulent pas de surueillans, on craignoit que ce prince ne vist les registres du parlement, qu'il n'y leust l'accusation de la femme qu'on sçait bien, & celle de Rauillac : & en fin qu'il ne fust recognoistre à ce grand parlement comme il a fait la verité du zele qu'il a voué au bien de cet Estat.

Mais encore, quel vacarme n'a-on fait, quel ruineux conseil n'a-on tenu, & quels monopoles n'a-on tramé contre ce prince sur l'opinion que vous avez eue qu'il avoit mené ce grand Sénat, ce vénérable parlement de représenter au Roy les abus de l'Estat, les ruineux desseins que l'on dresse à la grandeur de cette Monarchie? Et qui ne sçait, que si vostre vouloir eust secondé vostre pouvoir, & celui de vos Bazanez, que ce bon prince seroit déjà dans la Bastille. Vous y avez opiné tout haut, braue Dolé. Mais sçachez trestous que la capture d'un si grand prince, mesmement en une si grande innocence de ces actions ne passe pas aisément, ny sans solennelle consultation du Ciel, que la vie qui en couvrent tant d'autres, de qui tant d'autres vies dependent, & qui remplit tant de place, ne se déplace pas, comme celle qui tient à un simple nœud, & que ces ames si rares & exemplaires coustent plus à faire mourir, qu'une ame populaire & inutile, & qu'il est ce bon prince si attaché à l'Estat qu'il n'en peut sortir que tout ne se mette en pièces, non plus qu'en ce bouclier admirable de Minerve, l'image de l'ouvrier ne s'en pouvoit tirer qu'en pièces.

Et tous ces autres princes, & tous ces bons François, qui avec ce grand prince ont fait party avec la grâce de leur Roy, que vous ont-ils fait, Madame, & en quoy ont-ils desservi le Roy ou le public? dites nous en la cause, comme vous nous faites voir les effets de vostre indignation. Ha! Madame, c'est trop presser & opprimer ces glorieux Athletes de nostre gloire, c'est par trop autoriser l'insolence indiscrette de ces pigmees, de ces auortons de fortune, qui crouassent en corbeaux affamez, & abayent en chiens enragez contre l'honneur de ces Braves, ne pouvant comme aiglons bastards supporter les rayons d'un si beau Soleil. Ha! qu'il fait beau voir qu'un faquin paré des plumes estrangères, qu'un lasche, qu'un risandre vueille tenir le haut sur Longueville, la gentillesse, la courtoisie, les delices de cet Estat, & si courageux qu'il sera couronné comme jadis le jeune Diomedé d'autant de Lauriers qu'il redra de combats, Qu'avez-vous résolu, Madame, de faire de ce beau mignon? n'est ce point d'en faire un vice roy? ie le croy: car vague un office en la iustice, un benefice en l'Eglise, une place en nos forteresses, l'Anchre, à l'Anchre. Et mesmes depuis peu n'avez-vous pas osté Amboise à ce grand prince avant la closture des Estats malicieusement, pour le donner à ce grand Marechal? Et puis, Madame, ne luy avez-vous pas destiné pour gendre

vn prince, vn fils de nostre grand Henry, de vostre bon mary? n'a il pas luy seul plus de finaces que tous les Seigneurs & Princes du Royaume? & qui a tant de millions que nostre Henry nous auoit laissés? Qui? Tous ces deniers qui se sont leuez, & qui se leuent sur la sueur & sur le sang du pauvre peuple que ce beau mignon : mais encores n'est-ce pas le traicter en Roy, que de vouloir faire declarer les eunemis criminels de leze maiesté, & les enuoyer à la Bastille, vous le sçauiez braue Longueuille, comme on vous a mis sur le tapis, vous le sçauiez aussi braue Nestor, Genereux Turenne, tout blanchy sous les signalez seruices que vostre zele a rendu au bien de cest Estat.

Et encore, Madame, que vous a fait ce grand Parlemét pour l'auoir traicté avec tant de rigueur? Que dites vous Dolé? que dites vous Bullion? qu'il faut enuoyer vos bons Seigneurs les vns en Greue, & les autres à la Bastille, vous osez vous si insollement esleuer contre ceux qui ont donné le poux & le mouuement a vostre fortune. Hé! Madame, permettez vous qu'on diffame des personnes si sacrésaintes, & des Genies, & Dieux tutelaires de vostre autorité, & de vostre grandeur? Il y a, vous dit ce grand Senat, des abus en l'Estat, des voleries aux finances du Roy, & de l'excez aux subides du peuple: est-ce vn crime Madame, de dire le vray? Si le peuple crie, & si tout crie, ne sera il pas permis à la iustice de recueillir les larmes des subiects, & les presenter à son Roy pour faire repleuoir ces cris, & ces larmes en graces, & benedictions, comme le soleil rend à la terre en pluye pour l'enrichir des fruiets, les vapeurs qu'il a tiré de la terre. Le temps, dites vous, n'est pas propre pour corriger nos mœurs, & nos abus: Mais, Madame, ne donnez pas au siecle nostre deprauation, mais aux hommes de nostre siecle, ne nous en deschargeons point sur le temps, car ils sont en nous, & non a nos ans: Ne disons point que c'est chose par trop difficile: ce n'est pas parce que cela est difficile, que nous n'osons l'entreprendre, mais plustost parce que nous n'osons pas l'entreprendre, cela est difficile. Mais combien ayie meilleure opinion de vous, que vous mesme? Car ie dis que vous pouuez accomplir tout cela avec vne grand gloire, mais que vous ne le vouliez pas: & que si vous en vouliez faire l'essay, que vous le trouueriez en l'action mesme plus facile, que vous ne l'avez conceu: mais voulez vous que ie die le vray? Nous auons honte d'apprendre à estre gens de bien. Et parce que ces bons princes, & ce grand Parlement recognoissent les monopoles qu'on

trame en faueur de nostre Bazané contre la grandeur de ceste Monarchie, on voudroit bien loger nos Princes à la Bastille, pour pouuoir avec aisance, authentifier ce funestre dessein.

Ha! Madame, ce siecle n'est pas vn siecle d'or, mais vn siecle de fer, Car au siecle d'or de nos anciens, le plus puissant v-
soit avec moderation de son autorité, n'auoit iamais volonté d'essayer combien il estoit puissant à l'encontre de ceux qui re-
leuoient de sa puissance, ne cōspiroit contre la vie de son moin-
dre: Aucun suiet aussi ne s'esleuoit contre son superieur, d'au-
tant faisoit gloire d'obeyr à celuy qui commandoit bien: & puis
aucun ne pouuoit estre plus puissant, qui ne fust le meilleur. Au
contraire, Madame, en ce siecle ce n'est que passion, que desrei-
glement, que desbauche d'esprit, que desordre, que confusion,
qu'opiniastreté a mal faire, nous sommes plustost rompus, que
redressez: nous aimons mieux mourir avec nos vices, que les
vices en nous. Nos testes, ie parle de nous autres qui manions
l'Estat sont blanches au dehors, mais noires au dedans, la plus
part de nous auons le poil, & l'autorité des vieillards, mais les
vices des enfans: & ne sommes innocens que par ignorance. En
ce premier siecle encore, le seruiteur ne se pouoit esleuer con-
tre l'enfant de la maison sans estre criminel, ny luy refuser l'hō-
neur, & le respect sans estre seuerement puny, parce que ce
mespris reiaillissoit à l'interest du pere: Et auourd'huy en vn
grand Estat, en puissant Royaume où les Rois & les Princes
sont donnez de Dieu, de petits coquineaux & des larrons pour
se voir veillés par vn grand Prince, qui pour estre de la maison
à part au ressentiment de ces ruines s'esleueat contre luy: & cō-
me ces Geans bouffis d'orgueil & de presumption conspirent
contre luy: & non seulement contre luy, mais contre tous les
bons & fideles François. Helas! Madame, que l'assassinat en-
trepris sur la personne de ce grand Marechal de Bouillon, de
ce bon François, de ce fidele, zélé seruiteur, crie. Et quoy? se
peut il faire, qu'en France, qu'en vn si grand Royaume les rois,
& les bons François ne pouuans mourir d'vne belle main, ny
d'vne belle espee, soient ruez d'vn coup de couteau? ie ne m'en
estonne pas, Madame, car vn iniure impuniment receuë en ap-
pelle vne seconde, & la seconde vne troisieme, & ainsi de degré
en degré iusques à l'infiny. L'impunité de la mort de ce grand
Henry, de ce bon Prince autorise tons ces assassinats, qu'on
proiette: & si on a entrepris sur le pere, si on conspire contre
es Princes, croyez qu'on conspirera bien encore nostre ieu-

ne Roy. Je pleure, Madame, quand ie me represente, comme vous fistes rayer des cayers l'article qui portoit la recherche des auteurs du paricide de nostre Grand Henry.

Le temps ne permet pas, dites vous, de toucher ceste chor-de. La femme qui est entre deux murailles veit encore, il y au-roit du danger d'esbranler tout l'Estat. Helas ! faut bien croi-re donc que vous sçavez que l'auteur est bien puissant Mais si puissant qu'il soit, que craignez vous ? Doutez vous, que cō-me tous bons François ont partagé aux travaux, & la gloire des triomphes de ce grand Roy, qu'ils n'ayent aussi tous part au res-sentiment de l'assassinat commis en la personne : Nous eussions, comme nous ferons encore, joint nos armes à celles que la dou-leur, & les iustes regrets vous doiuent faire prendre, nous eus-sions secouru vostre dueil de nos forces, & tiré vn pie vengean-ce, de ceste cruauté. Ce grand prince, Madame, vous le sçavez, s'est offert, comme interessé en cest assassinat, d'entreprendre ceste grande poursuite, & en eust tiré party si vostre ressentiment eust fauorisé son zele Vous y auez résisté, parce que, peut estre, ce coup eust rompu le dessein, qu'on a dressé aux ruines de ceste Monarchie. Plustost mourir, vous le deuiez, Madame, que de defnier, à l'amour que ce bon mary vous portoit, la vé-geance de ceste perfidie: au moins il faillloit faire quelque effort, puis qu'en ces si signalees occasions les efforts iustes sont ne-cessaires ; les necessaires, honnestes ; & les honnestes des des-charges de nostre debuoir.

Que si les princes crient, si les bons François, si la iustice, Ha ! Madame, que le peuple crie bien plus encore : De l'issue de nos beaux Estats, tout y a esté, vous le sçavez, Madame, bri-gué, gaigné, corrompu. Les Deputez auoient tous les matins leur leçon par escript : l'issue aussi nous a fait voir que le reme-de est pire que le mal ; Car qu'a on arresté, ny conclu, qu'une alliance d'Espagne, qu'une funestre ruine de la gloire de ceste Monarchie ? Et encore on ne tient pas au peuple ce qu'on luy a promis : Car vous auez promis aux Deputez d'abolir le droit annuel : vous l'auez fait à la la verité, mais dix iours apres vous l'auez remis. Ha ! quelle est bien gardee la foy publique. Vous auez aussi promis la reuocation de tant de pensions inutiles, mais nous les augmentons tous les iours, & surchargeons des plus en plus le peuple.

Et parce que nos bons princes, ce bon Senat, & tous les bon François recognoissent, où vont ces pernicious desseins, ils ai-

ment mieux mourir, Madame, avec de l'honneur que de sui-
 ure par leur lascheté aux ruines de ceste Monarchie, comme ce
 bon citoyen præneste, qui pouuant viure en la mort des Lel-
 biens, aima mieux mourir avec eux. Car cela est trop visible,
 que c'est à ce coup qu'on veut fleurdeliser nostre bon Bazané,
 nous le sçauons, comme le Chancelier a refusé le sequestre
 du Marquisat de Saluce, pour le faire dōner à l'Espagnol: Nous
 sçauons qu'il fauorise le dessein, que ce mesme ennemy a sur
 Cleues, & sur le riedmont, l'vn pour nous mettre vne barriere
 entre les Holandois, & les Allemans: & l'autre pour le faire Roy
 des Romains. Nous sçauons pourquoy on vouloit à ces Estats
 faire ordonner pour loy fondamentale, que nostre Roy rele-
 ueroit du temporel de l'authorité de l'Eglise: nous voyons en-
 core par trop, à quoy aboutit le dessein de ceste belle alliance:
 c'est, Madame, pour donner moyen à cest ennemy, de triom-
 pher de nos ruines: car par ce moyen tous nos alliez se départēt
 de nos alliances. Et encor par malheur, afin qu'il se preuille de
 nostre desunion, on vous veut par le mescontentement du peu-
 ple, de la iustice, & de nos princes legitimes engager en des
 guerres ciuiles. Ha! madame, il faut costoyer ce rocher, plus
 nous le recognoistrans espouuentable, mieux nostre appichē-
 sion apprendra d'en fuyr le peril. Iason apres auoir semé les
 dents du Serpent, desquelles naquirent des gendarmes, ietta
 vne pierre au milieu d'eux, les fit eileuer les vns contre les au-
 tres, & la fin entretuer; afin de rapporter paisiblement la toison
 d'or. Estouffons, ie vous prie, ce Serpent au berceau, naitrons
 pas sur nous la malection du peuple, & par apres l'indignation
 du Ciel.

Ie crains, Madame, ie crains que si vous faictes par opinia-
 streté ce que vous ne deuez prs raison, & par passion ce que
 vous ne deuez entreprendre que par amour, que ces bons prin-
 ces forcez de la puissance d'vn charitable zele, la l'arme à l'œil,
 & mille & mille sortes d'execrations contre les auteurs de ce-
 ste confusion, tascheront de repousser par la valeur de leur es-
 pee la violence de ceste passion. Ils retiennent, tant qu'ils peu-
 uent, l'effor de ce grand mouuement. Nous sçauons leur iustes
 intentions: & comme à ceste leuee d'armes que la mesme pieté
 leur auoit fait prendre, tost qu'ils recogneurent. que plusieurs
 se vouloient mettre hors des gonds du debuoir, & cornoient
 la guerre, qu'aussi tost ces Braues, & ces petits commencemens
 iugeans qu'elle seroit l'issue de ceste confusion, en pilotes ge-

nerveux tournerent teste vers la tempeste, empescherent ces faux accords, qui vouloient troubler l'harmonie de cet Estat, & soustindrent par leur prudence le branle de tout l'Europe.

Que si aujour d'huy, qu'à Dieu ne plaise, ils reprennent leurs glorieuses brisces : c'est, Madame, qu'au lieu d'un bon amendement tout a empié, que les cris du peuple ont redoublé, & que les desseings de nostre ennemy sont sur le point de s'esclorre a la ruine de vostre repos. Ainsi puis que tous les bons François jettent les yeux sur eux, & l'esperance de leur allegement sur leur zele, & sur leur courage, ils ne pourrout, Madame, ces braues Princes, desnier au public, & a leur ieune Roy, les effects de leur zele. Ouy braues Athletes, ie croy que, comme vous estes le rampart de la grandeur de vostre ieune Roy, & la seule tour d'airain, qui n'a peu estre percee par la force de l'or de Castille, que vous joindrez aussi a la grandeur de vostre zele le merite de vostre valeur. Et si c'est vn arrest du destin, que la gloire de cet Estat ne doive plus long temps fleurir, vous aurez au moins de l'honneur, que le fer de l'ennemy en soit la ruine, plustost que ces menees, & ses corruptions, & s'il nous faut estre miserables, au moins il n'y aura point de crime de vostre part attaché a nostre misere.

Vous pouuez, Madame, vous pouuez avec aisance empescher ce desordre, & destourner l'orage de la ruine de nostre repos. Car puis qu'on vous chante si haut que l'Estat est vendu, que ce mariage est la planche sur laquelle de Madril on veut venir a Paris pour destourner nos bons Bourbons, & que ce venerable Parlement sçauant aux remedes de ceste maladie a porté a vos pieds l'antidot & le preseruatif de ce venin, ne deuez vous pas pour vn temps faire halte à ce mariage : & cependant respondre aux Cahiers des Deputez, aux remonstrances du Parlement, & au mescontentement du peuple, afin que l'affection qu'on recognoistra que vous portez au bien de cest Estat, vous acquere pour reconquerir à nostre ieune Roy, ce que cet ennemy, auquel vous le voulez aillier luy detiét, autant de soldats & de Capitaines que vous en voulés mettre sur pied pour nous perdre.

Croyez, Madame, que si vous mesprisés les larmes du peuple, & la iustice des hommes, que vous vous engagerez avec nous aux coups de la iustice du Ciel. Les prieres sont filles legitimes de Iupiter, elles on cela de charitable, que quand elles sont bien receues de la personne à laquelle elles s'adressent, elles suppliét Iupiter pour la prosperité : au contraire cela de iuste, que si on

ne les escoute ainſi qu'elle meritent, ellès retirent l'ire de Iupiter, & le prououent à vne ſeuere & violente vengeance.

Ceux qui ont le meſnage d'un grand Eſtat, en tous les grands & ſignalez actes, auxquels le bien public ſert de premiere cauſe, doiuent fermer leurs yeux à leurs paſſions particulieres. Ainſi Agamemnon voyant que le Dieu Appollon eſtoit irrité contre les Grecs, à cauſe qu'il n'auoit voulu rendre la belle Criſeis à ſon pere, apres auoir fait rendre vn long combat à ſon amour, la rendit pour appaiſer l'ire du Ciel; *Si le conſeil, diſoit ce ſage, a trouué bon que Criſeis ſoit rendue, ie n'y veux contreuenir. car ie ne deſire pas que mon plaiſir particulier ſoit cauſe de la perte de tous ces Grecs.* Vous deuez auſſi, Madame, ſur les plaintes & crieries qu'on fait, & ſur les remonſtrances de ce grand parlement prendre ceſte genereuſe reſolution, & dire tout haut, Puis que ce venerable Senat ne trouue à propos de preferer l'alliance de l'Eſpagnol aux alliances de tous les Princes de l'Europe, & que ie perdray les bons amis de ceſt Eſtat, pour donner le baiſer d'amitié à celuy qui ne peut eſtre qu'ennemy de la France, ie les ſuiuiray ces ſages teſtes, ces fermes colonnes de la grandeur de ceſte Monarchies.

Et puis, Madame, vn grand courage ne s'allie iamais avec ſon ennemy. Ainſi Achille apres l'oſſence qu'il euſt receue d'Agamemnon, pria de s'appaiſer & d'accepter le mariage de l'une de ſes filles, le refuſa auſſi honorablement que genereuſement. Le grand HENRY ennemy immortel de ceſt ennemy a eu auſſi le courage ſi genereux que de ne vouloir l'alliance de ce ſuperbe. Et quoy; n'heritons nous pas de ſon reſſentiment auſſi bien que ſon courage? Sera-il dict que l'apprehenſion que nous auons de cet ennemy nous face rechercher ſon alliance, & qu'on donne à noſtre laſcheté le blaſme d'auoir eſté vaincus par noſtre coyonnerie, ne le pouuans eſtre par le fort de nos armes? C'eſt biē rauallier le merite du courage de ceſte genereuſe Nobleſſe Françoisſe, Nobleſſe qui à ſa ſeule demarche a tousiours ſoit trembler ſes ennemys, & n'eſt iamais venue aux mains avec cet ennemy de noſtre grandeur, qu'elle n'ait eu plus de peine à luy donner la vie qu'à le combattre.

Et en core. Madame, ſi ce grand Agamemnon, ſi ce bon Roy donna pour victime à Diane couroucée ſa fille, ſa chere Iphigenie, pour rendre le vent fauorable à ſes vaiſſeaux, & leuer les empeſchemens qui les retenoit dans le port, & ſe chargeant ſeul du malheur tombé ſur toute la Grece, aimant mieux

perdre sa propre fille que de voir plus long temps ses ſuiets en peine, Si l'excez de l'amour qu'il portoit au public luy fit com-
mettre vne eſpece d'inhumanité contre ſoy meſme, l'amour
Madame, que vous deuiez au public, au Roy, & à l'Eſtat, deu-
roit contrepeſer la paſſion que vous auez pour ce beau Mar-
quis. Ha; Madame, bien que Didon euſt enſeuely toutes ſes
amours dans le meſme tombeau ou elle enterra les cendres de
ſon mary Sichee, toutes fois l'impudence Romaine n'eut point
honte de le faire bruſler, languir & mourir pour Ence. Vous
deuiez, bien que toute chaſte, craindre ce meſme iugement, &
pour oſter tout ſubiet de ſoupçon vous deſpouiller de ceſte
paſſion ruineuſe, pour mettre à couuert voſtre honneur d'un
amour calomnieux, comme Vlyſſe ſe voyant ſur le point de
faire naufrage, deſpouilla ceſte belle robe que Calypſo luy au-
oit donnee. Croyez moy, les Singes embrasſent leurs petits
pour les eſtouffer, & le liere accolle la muraille pour l'attenter.
Vous deuriez encore, Madame, permettre la recherche des vo-
leries des finances du Roy, des trahiſons de l'Eſtat, & des conſ-
pirations qu'on fait contre nos Prince, afin que par vne pie
vengence, le ciel irrité contre nous, appaiſaſt ſon ire & ſon
indignation, Il n'y a, Madame, ſacrifice plus agreable à Dieu
que celui d'un crime bien eſgorgé,

Et parce que Dieu eſt irrité des crimes de ces particuliers, il
faut que la France, cette pauvre France en general ſoit expoſée
au fer, & au tranchant au ſang, & au carnage, Il me ſouuient
Madame, auoir leu dans Homere, ce grand homme d'Eſtat.
que Vulcan auoit graué deux citez ſur les armes d'Achille, &
qu'en l'une il n'y auoit que nopces, que feſtins, & que deuant
l'autre deux armées eſtoient campees, ayans deux differens
deſſeings: car l'une vouloit tout mettre au ſang & au carnage, &
raſer la ville à fleur de terte, & l'autre ſe contentoit de parta-
ger les biens & richeſſe de ceſte ville: Nous voicy, Madame,
nous voicy au même eſtat; vous eſtes dās les nopces, dās les fe-
ſtins, tout retêrit chez vous, de cris de ioie, & d'allegreſſe. Mais
tous les bons François ſont dans les pleurs, dans les larmes, &
aſſiegez, ſi Dieu ne deſtourne l'orage, de deux armées de dif-
ferent deſſein: car l'une a iuré la ruine de noſtre repos, de no-
ſtre gloire, & de noſtre grandeur, & l'autre pouſſee d'un cha-
ritable zele, & d'un ſainct amour qu'elle porte à ſon Roy, à
l'Eſtat, & à ſa patrie, ſe veut preſenter pour partager, non nos
deſpouilles, mais nos malheurs, nos miſeres & nos ruines. Et

puoir faire teste à l'orage qui nous menace, vous fauorisez la premiere, & nos bons Princes, comme des bons & fideles protecteurs de nostre bien & de nostre grandeur autoriseront la seconde. Vous scauez bien, Madame, comme ces bons Princes ne sont point poussez à ceste genereuse action, pour vous obliger à donner à l'un de l'argent, à l'autre des charges, & à l'autre des fortresse. Vous scauez, braue Villeroy, comme ce grand Prince à la conference que vous deuiez auoir avec luy, à Creil, vous dit tout courroucé, qu'il ne failloit pas mettre sur le tapis son interest particulier, mais celuy du public, qu'il failloit satisfaire aux remonstrance de ce grand Parlement, & pour l'affermissement de la gloire de ceste Monarchie confirmer les alliances des Princes estrangers.

Et qui sera donc, si on en vient à la rigueur, le bon François, qui ne ioin dra son zele à la valeur de ces bons prince, qui ne se représentera avec eux au deuant des yeux la grandeur de nostre ieune Roy, & l'honneur de nostre patrie, qui ne s'ermuera de courage pour ne laisser perdre la gloire de ceste Monarchie. O François ! ô bons François la valeur du genereux sang de ceux d'où vous auez tiré naissance, le courage dont ils ont terrassé tant de fois cet ennemy de nostre gloire, & le saint zele de nos Princes par vn gracieux appel, inuitent vos courages à ce champ d'honneur : ioignez donc vostre ressentiment à celuy que la douleur des ruines de cest Estat leur fait auoir, secourez leur zele de vos forces, afin qu'avec vostre aide ces Braues releuent de ceste prochaine ruine la grandeur de vostre patrie : & la retirent de l'esclauage de l'Espagnol, de cest ennemy de nostre bien, de nostre gloire, & de nostre repos, vous voila à la cadene, à l'esclauage, & au premier iour à l'inquisition : & qui pis est, vous verrez bien tost ce glorieux nom de François, changez en Castillan. Helas ! ie pleure quand ie me représente que la passion de quatre ou cinq coquineaux, traistres à leur Roy, & deserteurs de leur patrie, soit sur le point de mettre ce grand Estat, ce florissant Empire en vne funeste cendree. Et quoy ? pour conseruer le general, & pour autoriser la grandeur de nostre ieune Roy, qui ne s'esleuera contre ces pensionnaires d'Espagne, & ne s'armera de pierre pour lapider ces vendeurs de nostre bien, & de nostre liberté. O François ! ou vous n'estes plus François, ou vous ferez vostre party avec les bons François. I'ay honte, ie rougis en mon ame de voir, qu'on aye tant tardé à mettre la main à vne si glorieuse

& genereuse execution. Ce sont, direz vous, Mesmes Officiers
 qui seruent le feu Roy. Ha! Madame, iamais Conchine ne pos-
 sedita durant le viuant du feu Roy tant de belles & fortes cita-
 deles, iamais il ne fut ny officier, ny Marquis, ny Marechal:
 c'estoit vn petit hibou, qui ne parloisloit que la nuit: & aujour-
 d'huy que de la poussiere, le voila esleué au Ciel, le voila le pre-
 mier Comedien de ceste funeste traiedie qu'on ioue sur le the-
 atre de ceste Monarchie, & vn Dollé, vn Bullion: & tant
 d'autres, qu'estoient ils, Madame, du viuant du feu Roy? Ha!
 i'ay honte de le dire, mais plus grand'honte de les voir mesna-
 ger si tristement les deniers du Roy & du public. Et le chā-
 celier, Madame, n'estoit il pas sur le point de receuoir vn bō-
 net rouge: si le feu Roy eust vescu encore quelques iours? Et ce
 Cadet de Gascongne, ce morfondu, qui n'a que des paroles de
 menaces: Et qui pour faire parler de luy veut faire vn coup de
 Gascon: Auoit il le cœur, ny l'oreille du Roy? & vstoit il d'un Em-
 pire absolu, comme il fait aujour d'huy? L'honneur trop la me-
 moire de ce grand Roy pour croire, que de son viuant vn Con-
 chine, vn Dollé, vn Bullion, & tant d'autres l'arronneaux euf-
 sent eu voix en si grand Estat: Et qu'il ne reconnut, de sage
 Roy, que ce Cadet couuoit en l'ame quelque funeste, & mal-
 heureux dessein. Et par malheur, Madame, vous vous seruez
 de ceux, que le feu le Roy ne voyoit que d'un œil, & encore œil
 d'indignation: Ce sont ceux qui gouernent l'Estat, partagent
 les finances, & se iouent de l'autorité de nostre ieune Roys
 Ainsi, Madame, ne dites pas, que vous vous seruez des mesme.
 Officiers que le feu Roy, mais des ennemis de l'Estat, & de la
 patrie. Et encore, Madame, vous protegez l'impunité de leurs
 crimes: & ne voulez permettre que ce grand parlement face re-
 cherche de leur vie. Et quoy? si le Roy doit la iustice au parti-
 culier, a plus forte raison au public: si vn simple larcin merite
 la mort, a plus forte raison vne volerie des deniers du Roy, &
 du public: si vn simple homicide merite la chorde, a plus forte
 raison le cruel assassinat commis en la personne du plus grand
 Roy del Europe merite d'estre expié, non seulement par le sang,
 mais par le feu, & par les plus cruels tourmens d'un Phalaris.

Et parce que ces bons Princes, les vrais enfans de la maison
 voient si tristement parrager les despouilles de leur pa-
 trimoine, qu'ils en crient & en priué & en public, & qu'ils e-
 demandent iustice, vous vous esleuerez contre eux, les men-
 cez d'une Bastille, & encore les voulés faire danser en vn temp^{a-}

de dueil, & en temps, auquel on a compromis de nostre grandeur. Ha! ce seroit vne lacheté par trop grande, & vne coyonnerie de Florence, de tourner le dos au danger, & le visage au vent & à l'orage: ferme il faut faire ferme, au besoin. Et où il y va de nostre liberté, il faut crier tout haut, de la vie ou de la mort, & apres auoir plaidé la cause par les larmes, la plaider par les armes. Ainsi, mes Princes, mes braues Princes, chers enfans d'une mere que vous avez tousiours vniquement chérie, redoublez maintenant vostre zele, & vostre courage, embrassez la cause de vostre mere, de vostre patrie, autorisez la grandeur de vostre ieune Roy: & afin que ce grand Estat ait son plein & son large, & que l'injustice n'attire sur luy & sur vous l'indignation du ciel, prestez la main à la iustice, à ce grand Parlemēt, à ce venerable Senat: Vous estes assez puissants & assez forts. Car si cyrus se croioit assez fort, pourueu qu'il soustint vne cause iuste. Helas! puissans, que vous estes puissās, mes Princes, puis que vous soustenez la cause d'un ieune Roy, qu'on va insensiblement accabler, & protegez l'autorité de la iustice. Il ne faut pas aller d'un pied en vne action qui de sire tant de courage? il ne faut pas imiter Sextius ce grand homme d'Estat, si vous ne voulez estre mocquez comme luy, qui saigna du nez, & perdit courage à moitié chemin d'une grande entreprise, Tout vous rit, tout vous aime d'amour, le peuple vous ouure & les cœurs & les bras? Ainsi rompons ces traites, qui ne sont que des neiges pour nous prendre, n'attandons de faire de nuit ce que nous pouuons faire de plein iour. L'occasion mesprisée, mes Princes, nous eschappe, comme la Panterbe s'esuanouit, si celle n'est soudainement tirée de terre.